



## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ

### ԴԱՏԱԿԱՆ ԿԱԶՄԻ ՈՐՈՇՈՒՄ

#### ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ

Քաղ. Երևան

29 օգոստոսի 2024 թ.

Սահմանադրական դատարանի դատական կազմը՝

Նախագահությամբ՝ Ե. Խունդկարյանի

Անդամակցությամբ՝ Ս. Սաֆարյանի

Հ. Հովակիմյանի

Քննության առնելով Մհեր Ենոքյանի անհատական դիմումի ընդունելիության  
հարցը,

#### Պ Ա Ր Զ Ե Ց .

1. Մհեր Ենոքյանը (այսուհետ՝ Դիմող), դիմելով Սահմանադրական դատարան (դիմումը Սահմանադրական դատարան է մուտքագրվել 2024 թվականի օգոստոսի 19-ին), խնդրել է հետևյալը.

«(...) 2. ՀՀ քրեական օրենսգրքի 85-րդ հոդվածի 1-ին մասի 1-ին կետը («պատժի կրման ընթացքում նա դրսևորել է պատշաճ վարքագիծ» ձևակերպումը) ճանաչել ՀՀ Սահմանադրության 3-րդ հոդվածի 3-րդ մասին, 5-րդ հոդվածի 2-3-րդ մասերին, 78-79-րդ, 80-81-րդ հոդվածներին հակասող: Հիշյալ դրույթը Սահմանադրությանը հակասող չճանաչելու պարագայում, ՀՀ Սահմանադրական դատարանի մասին օրենքի 69-րդ հոդվածի 10-րդ մասի համաձայն, խնդրում ենք քննարկել ներքոհիշյալ 3-րդ, 4-րդ, 5-րդ կետերը:

3. Թիվ ԵԴ1/0045/12/23 գործով Մհեր Ենոքյանին ՊՎ ազատելը մերժելու վերաբերյալ դատական ակտերով կիրառված ՀՀ քրեական օրենսգրքի 85-րդ հոդվածի 1-ին մասի 1-ին կետով («պատժի կրման ընթացքում» ձևակերպումը) և նույն հոդվածի 2-րդ և 3-րդ մասերով սահմանված պատշաճ վարքի և կրկին անգամ հանցանքի գնահատման չափորոշիչների Դատարանների մեկնաբանումը և կիրառումը՝ առանց հաշվի առնելու օրենքի՝ 2017թ.-ից գործելու հանգամանքը՝ ճանաչել ՀՀ Սահմանադրության 73-րդ հոդվածի 1-ին մասին հակասող:

4. Դատական ակտերով կիրառված ՀՀ քրեական օրենսգրքի 85-րդ հոդվածի 1-ին մասը («պատժի կրման ընթացքում» ձևակերպումը) և նույն հոդվածի 2-րդ և 3-րդ մասերով սահմանված պատշաճ վարքի և կրկին անգամ հանցանքի գնահատման չափորոշիչների Դատարանների մեկնաբանումը և կիրառումը՝ առանց հաշվի առնելու համաչափության, որոշակիության սկզբունքները՝ ճանաչել ՀՀ Սահմանադրության 26-րդ, 28–29-րդ, 78-րդ և 79-րդ հոդվածներին հակասող:

5. Դատական ակտերով կիրառված ՀՀ քրեական օրենսգրքի 85-րդ հոդվածի 1-ին մասը («պատժի կրման ընթացքում» ձևակերպումը) և նույն հոդվածի 2-րդ և 3-րդ մասերով սահմանված պատշաճ վարքի և կրկին անգամ հանցանքի գնահատման չափորոշիչների Դատարանների մեկնաբանումը և կիրառումը՝ առանց հաշվի առնելու ՄԻԵԴ-ի իրավական դիրքորոշումները և այլ վերաբերելի դրույթները՝ ճանաչել ՀՀ Սահմանադրության 5-րդ հոդվածի 2-3-րդ մասերին, 80-րդ և 81-րդ հոդվածներին հակասող:

6. ՀՀ քրեական դատավարության օրենսգրքի 396-րդ հոդվածի 1-ին մասի 2-րդ կետում քրեադատավարական օրենքի խախտման չափորոշիչ հանդիսացող «էական խախտում» և «կարող էր խաթարել արդարադատության բուն էությունը» ձևակերպումների մասով ճանաչել ՀՀ Սահմանադրության 79-րդ հոդվածով ամրագրված որոշակիության սկզբունքին հակասող, 61-րդ հոդվածի 1-ին մասի և 63-րդ հոդվածի 1-ին մասին հակասող: Հիշյալ դրույթը Սահմանադրությանը հակասող չճանաչելու պարագայում, ՀՀ Սահմանադրական դատարանի մասին օրենքի 69-րդ հոդվածի 10-րդ մասի համաձայն, խնդրում ենք քննարկել ներքոհիշյալ 7-րդ կետը:

7. Թիվ ԵԴ1/0045/12/23 գործով ՀՀ քրեական դատավարության օրենսգրքի 396-րդ հոդվածի 1-ին մասի 2-րդ կետում քրեադատավարական օրենքի խախտման չափորոշիչ հանդիսացող «էական խախտում» և «կարող էր խաթարել արդարադատության բուն էությունը» ձևակերպումների Վճռաբեկ դատարանի կողմից մեկնաբանումը և կիրառումը ճանաչել ՀՀ Սահմանադրության 79-րդ հոդվածով ամրագրված որոշակիության սկզբունքին հակասող, 61-րդ հոդվածի 1-ին մասի և 63-րդ հոդվածի 1-ին մասին հակասող:

8. ՀՀ քրեական դատավարության օրենսգրքի 398-րդ հոդվածի 3-րդ մասում վճռաբեկ բողոքը վարույթ չընդունելու համար «հիմնավորումները բավարար չեն» ձևակերպումը ճանաչել ՀՀ Սահմանադրության 79-րդ հոդվածով ամրագրված որոշակիության սկզբունքին հակասող, 61-րդ հոդվածի 1-ին մասի և 63-րդ հոդվածի 1-ին մասին հակասող: Հիշյալ դրույթը Սահմանադրությանը հակասող չճանաչելու պարագայում, ՀՀ Սահմանադրական դատարանի մասին օրենքի 69-րդ հոդվածի 10-րդ մասի համաձայն, խնդրում ենք քննարկել ներքոհիշյալ 9-րդ կետը:

9. Թիվ ԵԴ1/0045/12/23 գործով ՀՀ քրեական դատավարության օրենսգրքի 398-րդ հոդվածի 3-րդ մասում վճռաբեկ բողոքը վարույթ չընդունելու համար «հիմնավորումները բավարար չեն» ձևակերպման Վճռաբեկ դատարանի կողմից մեկնաբանումը և կիրառումը ճանաչել ՀՀ Սահմանադրության 79-րդ հոդվածով ամրագրված որոշակիության սկզբունքին հակասող 61-րդ հոդվածի 1-ին մասի և 63-րդ հոդվածի 1-ին մասին հակասող»:

2. Դիմողը, ներկայացնելով գործի դատավարական նախապատմությունը, նշում է, որ պատժից պայմանական վաղաժամկետ ազատման օրենսդրական չափորոշիչները սահմանվել են միայն 2017 թվականի մարտի 21-ին ընդունված ՀՀ քրեական օրենսգրքով և նույնական են մնացել 2022 թվականի հուլիսի 1-ին ընդունված ՀՀ քրեական օրենսգրքի 85-րդ հոդվածում:

Դիմողը գտնում է, որ վերջինս, պատիժը կրելով 1990-ական թվականներից, չէր կարող կանխատեսել, թե 2017 թվականին պատժից պայմանական վաղաժամկետ ազատման ինչպիսի չափորոշիչներ կսահմանվեն, որպեսզի կարողանար կանխատեսել իր գործողությունները:

Ըստ Դիմողի՝ 2017 թվականին սահմանված չափորոշիչների լույսի ներքո 1996 թվականից մինչև 2017 թվականն ընկած պատժի կրման ժամանակահատվածը գնահատելը որոշակիության սկզբունքի տեսանկյունից իրավաչափ չէ: Դիմողը միաժամանակ գտնում է, որ համաչափ չէ դիտարկել պատժից պայմանական վաղաժամկետ ազատման հարցը՝ առանց հաշվի առնելու դատապարտյալի գործողությունների և վարքի կանխատեսելիության հարցը, պատժի կրման պայմանները, իրավական ակտերի փոփոխությունները:

Մինչդեռ Դիմողը նշում է, որ դատարաններն անտեսել են վերջինիս բողոքներում հիմնավորված, Սահմանադրության 78-րդ և 79-րդ հոդվածներով նախատեսված համաչափության և որոշակիության սկզբունքների ակնհայտ խախտումները:

Դիմողի պնդմամբ՝ զեկույցներում Մհեր Ենոքյանի պատշաճ վարքագծի, կրկին հանցանք կատարելու ցածր հավանականությանը վերաբերող հիմնավորումները կազմում են առաջին ատյանի դատարանի և վերաքննիչ դատարանի որոշումների կեսից ավելին, սակայն դատարանները շրջանցել են դրանք՝ խախտելով նաև ՀՀ քրեական օրենսգրքի 85-րդ հոդվածի 2-րդ և 3-րդ մասերը:

Դիմողի գնահատմամբ՝ ՀՀ քրեական օրենսգրքի 85-րդ հոդվածի 1-ին մասը (մասնավորապես՝ «պատժի կրման ընթացքում» ձևակերպումը) և նույն հոդվածի 2-րդ մասով սահմանված չափորոշիչների մեկնաբանումը՝ առանց հաշվի առնելու համաչափության, որոշակիության սկզբունքները, Մարդու իրավունքների եվրոպական դատարանի իրավական դիրքորոշումները և միջազգային փաստաթղթերով ամրագրված այլ վերաբերելի դրույթները, ակնհայտորեն հանգեցնում են նաև Սահմանադրության 73-րդ հոդվածի 1-ին մասի խախտմանը:

Ելնելով վերոգրյալից՝ Դիմողը գտնում է, որ դատարանները ՀՀ քրեական օրենսգրքի 85-րդ հոդվածի 1-ին, 2 և 3-րդ մասերը մեկնաբանել և կիրառել են՝ հակասելով Սահմանադրության 73, 78-79 և 80-81-րդ հոդվածներին:

Դիմողը միաժամանակ նշում է, որ դատարաններն առհասարակ չեն անդրադարձել իր բողոքում ներկայացված խտրական վերաբերմունքը հիմնավորող փաստերին: Մասնավորապես՝ Դիմողի պնդմամբ՝ դատարանները, տեղեկացված լինելով չորս ցմահ դատապարտյալների նկատմամբ պատժից պայմանական վաղաժամկետ ազատ-

ման մասին որոշումներ կայացված լինելու մասին, Դիմողի պատժի կրման ողջ ժամանակահատվածը գնահատելիս եզրահանգել են, որ վերջինս պատժի կրման ժամանակահատվածի վերջին տարիներին է միայն պատշաճ վարքագիծ դրսևորել: Նշվածի հիման վրա Դիմողը գտնում է, որ վերջինիս պատժից պայմանական վաղաժամկետ ազատման իրավունքից զրկելը հակասում է Սահմանադրության 28 և 29-րդ հոդվածներին:

Ըստ Դիմողի՝ ՀՀ քրեական դատավարության օրենսգրքի 396-րդ հոդվածի 1-ին մասի 2-րդ կետում ամրագրված «էական խախտում» և «կարող էր խաթարել արդարադատության բուն էությունը» ձևակերպումները, ինչպես նաև նույն օրենսգրքի 398-րդ հոդվածի 3-րդ մասում ամրագրված «հիմնավորումները բավարար չեն» ձևակերպումը հակասում են Սահմանադրության 79-րդ հոդվածով սահմանված որոշակիության սկզբունքին:

**3.** Ելնելով դիմումի և կից ներկայացված փաստաթղթերի ուսումնասիրությունից, ինչպես նաև ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի պահանջով՝ Սահմանադրական դատարանի դատական կազմը գտնում է, որ սույն անհատական դիմումով գործի քննությունը ենթակա է մերժման՝ հետևյալ պատճառաբանությամբ.

«Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 1-ին կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում, եթե դիմումում առաջադրված հարցերը ենթակա չեն Սահմանադրական դատարանին:

Սահմանադրական դատարանն իր՝ 2009 թվականի մարտի 17-ի ՍԴԱՌ-21 աշխատակարգային որոշմամբ (և հետագայում 13.11.2012թ. ՍԴԱՌ-80, 08.04.2014թ. ՍԴԱՌ-13, 07.04.2015թ. ՍԴԱՌ-19, ինչպես նաև 05.02.2016թ. ՍԴԴԿՈ/1-4, 18.02.2016թ. ՍԴԴԿՈ/1-5, 21.03.2016թ. ՍԴԴԿՈ/1-9, 02.04.2016թ. ՍԴԴԿՈ/1-13 և այլ որոշումներով վերահաստատված) իրավական դիրքորոշում է արտահայտել, համաձայն որի՝ «(...) բոլոր այն դեպքերում, երբ դիմողը, ձևականորեն վիճարկելով օրենքի դրույթի

սահմանադրականության հարց, ըստ էության բարձրացնում է այդ դրույթի կիրառման իրավաչափության հարց (...), ապա այդպիսի դիմումները ենթակա են մերժման՝ (...) որպես սահմանադրական դատարանի քննության ենթակա հարց չառաջադրող դիմումներ»:

Սահմանադրական դատարանի դատական կազմը գտնում է, որ նորմատիվ իրավական ակտի սահմանադրական կոնկրետ վերահսկողության համար վերոհիշյալ պարտադիր նախապայմանի ամրագրմամբ, ի թիվս այլնի, նպատակ է դրվել Սահմանադրական դատարանում քննության առարկա դարձնել ենթադրյալ սահմանադրականության այնպիսի վեճեր, որոնց հիմքում դրված են ոչ թե կոնկրետ գործի փաստական և/կամ իրավական հանգամանքների գնահատման, այլ վիճարկվող նորմատիվ իրավական ակտի սահմանադրականության գնահատման, սահմանադրական նորմերի վերջնական մեկնաբանության և կիրառման հարցեր:

Սահմանադրական դատարանի դատական կազմը հարկ է համարում արձանագրել, որ Սահմանադրական դատարանի կողմից նորմատիվ իրավական ակտի դրույթի կիրառման իրավաչափության հարցի քննարկման դեպքում Սահմանադրական դատարանը կստանձնի դատական ակտ վերանայող դատական ատյանի գործառույթ, ինչը ոչ միայն չի բխի Սահմանադրության և «Սահմանադրական դատարանի մասին» սահմանադրական օրենքի կարգավորումներից, այլև փաստացի կվերացնի Սահմանադրական դատարանի և եռաստիճան դատական համակարգում ներառված դատարանների գործառույթների տարանջատումը:

Տվյալ դեպքում Սահմանադրական դատարանի դատական կազմը փաստում է, որ սույն դիմումով Դիմողի կողմից ներկայացված հիմնավորումներն առավելապես վերաբերում են դատարանների կողմից կայացված դատական ակտերի բովանդակությանը: Մասնավորապես՝ Դիմողը, վիճարկվող դրույթների ենթադրյալ հակասահմանադրականության առնչությամբ որևէ հիմնավոր փաստարկ չներկայացնելով, ըստ էության, իր անհամաձայնությունն է հայտնում դատարանների գործողություններին և նրանց կողմից կայացված դատական ակտերին: Այդ մասին են վկայում, օրինակ, դիմումում տեղ գտած այն դատողությունները, որ դատարաններն անտեսել են Դիմողի բողոքներում հիմնավորված, Սահմանադրության 78 և 79-րդ հոդվածներով նախատեսված հա-

մաշափության և որոշակիության սկզբունքների ակնհայտ խախտումները, կամ որ Դիմողի պատշաճ վարքագծի, նոր հանցանք կատարելու ցածր հավանականությանը վերաբերող հիմնավորումները կազմում են առաջին ատյանի դատարանի և վերաքննիչ դատարանի որոշումների կեսից ավելին, սակայն դատարանները շրջանցել են դրանք՝ խախտելով նաև ՀՀ քրեական օրենսգրքի 85-րդ հոդվածի 2-րդ և 3-րդ մասերը, կամ որ դատարաններն առհասարակ չեն անդրադարձել իր բողոքում ներկայացված խտրական վերաբերմունքը հիմնավորող փաստերին:

Վերոգրյալից բխում է, որ Դիմողը, ձևականորեն վիճարկելով օրենքի դրույթների սահմանադրականության հարց, ըստ էության, վիճարկում է դատարանների գործողությունները և նրանց կողմից կայացված դատական ակտերի իրավաչափությունը, որպիսի հարցի քննությունը դուրս է Սահմանադրական դատարանի իրավասության շրջանակներից:

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 1-ին կետով՝ Սահմանադրական դատարանի դատական կազմը

**Ո Ր Ո Շ Ե Ց .**

Միեր Ենոքյանի անհատական դիմումով գործի քննությունը մերժել:

Նախագահող՝

Անդամներ՝



Ե. Խունդկարյան

Ս. Սաֆարյան

Հ. Հովակիմյան